

## Konngol hooreejo e udditgol capanjoyabiire FBPM

بِسْمِ اللَّهِ الرَّحْمَنِ الرَّحِيمِ

E innde Alla jurumdeere, jurmotoodo.

Hade am jokkude, mido ñaagii nde nduwanto–den denndanngal terde FBPM e denndaangal ruttiiɓe to Joom men, kam e maayɓe juulɓe fof, nde Allah yurmotoo ɓe, yaafoo ɓe, haarna ɓe aljanna.

Avant de poursuivre, je vous prie de bien vouloir réciter la Fatiha pour le repos de l'âme des militants et sympathisants de l'ARPRIM qui nous ont quittés.

.... On njaaraama/Merci

Jaagordo Pinal e Ñeeñe e Kumpital e Jokkondiral e Parlemaa,

Terde Laamu e Juɓɓule Leydi,

Fiilaabe tedduɓe,

Bismaaabe tedduɓe, haa arti e ummoriibe leyde godde

Terde FBPM e yidɓe mum,

Musiɓɓe rewɓe e worɓe,

Mido yidi kadi ko adii fof, yettude hooreeɓe idinoove mi ardaade fedde ndee, sabu golle tiidde de ɓe ngollii dee.

So dum yawtii, mbiyen tan sosnooɓe FBPM e hitaande 1974, keewaano doole, keewano wallidiibe, kono aɓe njoginoo fiɓnde tiidnde, tee aɓe paamnoo no feewi « **alaa leydi mbaawndi ɓamtaade tawi ine yeebii demde mum e pine mum** ».

Ɓe kawrii e oon sahaa e caɗeele keewde : laamu heɓtinaano janɗe demde ngenndiije. So yimɓe ine janngina ko maa cuudoo. Ɓe njanngintunoo ko he nder saloŋaaji maɓɓe, walla cuudi maɓɓe, ɓe mbinndata heen sahaaji ko he ɓale. Dee caɗeele fof e heewde, haɗaani ɓe jokkude darnde, sabu maɓɓe yenaneede nafoore soomiinde he janɗe.

Alla rokki ɓe kadi wune law, sibu duubi 3 fat caggal nde laamu heɓtini fedde ndee, Leydi ndii yetti, e lewru kawle (octobre) 1979, pellital mawngal, so naatnude de nder duɗe mum, ndi hunii kadi laawɗinoyde de caggal duum. Dudal demde ngenndiije sosaa ngam heblude duum. FBPM ine faarnorii jeyeede e sakkite ndeen feere.

Caggal nde ndeen feere dartinaa e hitaande 1999, FBPM darii duubi 40 ngam **hirjinde e findinde**, mbele demde ngenndiije ine nduttoo nder duɗe laamu. Fedde ndee ine faarnorii kadi feere yettaande e hitaande 2022, ngam gartirgol demde de he ekkol, hay so tawii noon won ko ŋakki, haa teenti noon e laawɗingol demde ngenndiije de.

Duuɓi capande joy hikka ko FBPM darii e haɓaade humanbinnaagu ! Nder gure teeru e dowri, jannginoobe yarlitiiɓe fedde ndee, njannginii ujune keewde yimɓe, haa mbaawi winndude e tarde e hiisaade. Duum waylii nguurndam yoga e maɓɓe, udditani ɓe damal gannde e ndimaagu.

Law kadi, fedde ndee faami nafoore binndol, tokki dum himme mawɗo. Duum addani nde sosde jaaynde Fooyre Bamtaare e hitaande 1980, ngam humpitde, jokkondirde terde mayre, sarde binndol e ganndal, e yahdude e kesam-hesaagu jooni nguu. Hannde, Fooyre Bamtaare woni jaaynde wajjere yaltoore he demngal pulaar nder leydi ndii, ma a taw nii e nder diiwaan men oo no diidorinoo.

Kono hannde, godɗum, kesum, kimmuɗum jolii, potɗum daraneede : en naatanii yonta limrewal e ɗoyre tafaande. Ina waddii en kadi daraade mbele demde men ine ngona demde janngo.

Duum ine jeyaa e golle kese de Fedde ndee ummanii, rewruude e lowre enternet pulaar.org, so yollude caggitorde limrewe, binndande janɗe, celluka nanondiraaka, paabi demɗiwi, e kuutorde keblirde naatgol pulaar he karalle kese. Musiɓɓe rewɓe e worɓe,

Wonaa tan hanki men mo paarnorto-den oo mawninten doo hannde, ko ɓuri teenɗude, ngon-den ko e heblande demde men no kisiri janngo. Alaa e sago ko gollanoo koo hisnee, tiidtimee. Kono kadi, yontannde aroore ine foti daranaade yellitde demde men haa de njahda e kuutorde hannde.

Eɗen nduwii nde duuɓi 50 paadi ngaddanta demde men ngenndiije heɓde **gedal mum en timmungal nder janɗe leydi ndii, nder njuɓɓudi laamu leydi ndii, nder jaaynirde leydi ndii, nder pinal leydi ndii, e nder tageefo limrewal.**

**Yo Wuur FBPM !**

**Yo wuur Muritani keewal e coccondiral pine ! On njaaraama !**